



# 千字文

敕員外散騎侍郎周興嗣次韻

天地玄黃，宇宙洪荒。日月盈昃，辰宿列張。  
寒來暑往，秋收冬藏。閏餘成歲，律呂調陽。  
雲騰致雨，露結爲霜。金生麗水，玉出崑崙。  
劍號巨闕，珠稱夜光。果珍李柰，菜重芥薑。  
海鹹河淡，鱗潛羽翔。龍師火帝，鳥官人皇。  
始制文字，乃服衣裳。推位讓國，有虞陶唐。

## 千字文

周興嗣著

康熙字典網上版  
康熙字典體傳承版  
列印

一

弔民伐罪，周發殷湯。坐朝問道，垂拱平章。  
愛育黎首，臣伏戎羌。遐邇壹體，率賓歸王。  
鳴鳳在樹，白駒食場。化被草木，賴及萬方。  
蓋此身髮，四大五常。恭惟鞠養，豈敢毀傷。  
女慕貞絜，男效才良。知過必改，得能莫忘。  
罔談彼短，靡恃已長。信使可覆，器欲難量。  
墨悲絲染，詩讚羔羊。景行維賢，剋念作聖。  
德建名立，形端表正。空谷傳聲，虛堂習聽。  
禍因惡積，福緣善慶。尺璧非寶，寸陰是競。

資父事君，曰嚴與敬。孝當竭力，忠則盡命。

臨深履薄，夙興溫清。似蘭斯馨，如松之盛。

川流不息，淵澄取映。容止若思，言辭安定。

篤初誠美，慎終宜令。榮業所基，藉甚無竟。

學優登仕，攝職從政。存以甘棠，去而益誄。

樂殊貴賤，禮別尊卑。上和下睦，夫唱婦隨。

外受傳訓，入奉母儀。諸姑伯叔，猶子比兒。

孔懷兄弟，同氣連枝。交友投分，切磨箴規。

仁慈隱惻，造次弗離。節義廉退，顛沛匪虧。

## 千字文

周興嗣著

康熙字典網上版  
康熙字典體傳承版列印

二

性靜情逸，心動神疲。守真志滿，逐物意移。

堅持雅操，好爵自縻。都邑華夏，東西二京。

背邙面洛，浮渭據涇。宮殿盤鬱，樓觀飛驚。

圖寫禽獸，畫綵仙靈。丙舍傍啓，甲帳對楹。

肆筵設席，鼓瑟吹笙。升階納陛，弁轉疑星。

右通廣內，左達承明。旣集墳典，亦聚群英。

杜稿鍾隸，漆書壁經。府羅將相，路俠槐卿。

戶封八縣，家給千兵。高冠陪輦，驅轂振纓。

世祿侈富，車駕肥輕。策功茂實，勒碑刻銘。

磻溪伊尹，佐時阿衡。奄宅曲阜，微旦孰營。

桓公匡合，濟弱扶傾。綺迴漢惠，說感武丁。

俊乂密勿，多士寔寧。晉楚更霸，趙魏困橫。

假途滅虢，踐土會盟。何遵約法，韓弊煩刑。

起翦頗牧，用軍最精。宣威沙漠，馳譽丹青。

九州禹跡，百郡秦并。嶽宗恒岱，禪主云亭。

雁門紫塞，雞田赤城。昆池碣石，鉅野洞庭。

曠遠綿邈，巖岫杳冥。治本於農，務茲稼穡。

倣載南畝，我藝黍稷。稅熟貢新，勸賞黜陟。

## 千字文

周興嗣著

康熙字典網上版  
康熙字典體傳承版列印

三

孟軻敦素，史魚秉直。庶幾中庸，勞謙謹敕。  
聆音察理，鑒貌辨色。貽厥嘉猷，勉其祇植。  
省躬譏諫，寵增抗極。殆辱近恥，林皋幸即。  
兩疏見機，解組誰逼。索居閒處，沉默寂寥。  
求古尋論，散慮逍遙。欣奏累遣，感謝歡招。  
渠荷的歷，園莽抽條。枇杷晚翠，梧桐早凋。  
陳根委翳，落葉飄颻。遊鵠獨運，凌摩絳霄。  
耽讀翫市，寓目囊箱。易輶攸畏，屬耳垣牆。  
具膳餐飯，適口充腸。飽飫烹宰，飢厭糟糠。

親戚故舊，老少異糧。妾御績紡，侍巾帷房。

紈扇圓潔，銀燭煌煌。晝眠夕寐，藍筍象床。

弦歌酒宴，接杯舉觴。矯手頓足，悅豫且康。

嫡後嗣續，祭祀烝嘗。稽額再拜，悚懼恐惶。

牋牒簡要，顧答審詳。骸垢想浴，執熱願涼。

驢驃犧特，駭躍超驤。誅斬賊盜，捕獲叛亡。

布射遼丸，嵇琴阮嘯。恬筆倫紙，鈞巧任釣。

釋紛利俗，並皆佳妙。毛施淑姿，工顰妍笑。

年矢每催，曠暉朗曜。璇璣懸斡，晦魄環照。

千字文

周興嗣著

康熙字典網上版  
康熙字典體傳承版列印

四

指薪修祜，永綏吉劭。矩步引領，俯仰廊廟。  
束帶矜莊，徘徊瞻眺。孤陋寡聞，愚蒙等謗。  
謂語助者，焉哉乎也。

康熙字典網上版

康熙字典體傳承版列印

<https://www.Kangxizidian.com>